

cyBerita: Lelaman Internet Berita Harian Singapura.

[Singapura](#)

Galak belia libatkan diri dalam isu negara dan sejagat

Matlamat ingin dicapai Kelab Mendaki dalam sidang aktivis

By Adli Yashir Kuchit

KELAB Mendaki ingin menggalakkan lebih ramai golongan muda melibatkan diri dalam isuisu negara dan sejagat.

Presiden Kelab Mendaki, Encik Aaron Maniam, berharap para belia boleh menjadi pemangkin perubahan atau memimpin usaha meningkatkan kesedaran mengenai isu-isu yang dekat di hati mereka seperti perubahan iklim, pendidikan dan program pendekatan masyarakat.

Oleh itu sidang aktivis belia yang dianjurkan kelab tersebut esok akan memberi peluang kepada para peserta membincangkan dan berkongsi pengalaman mengenai kegiatan-kegiatan aktivis.

'Kami berpendapat selain menumpukan perhatian untuk membantu golongan belia Melayu/Islam, kami juga perlukan program yang menjangkau masyarakat yang lebih besar,' kata Encik Aaron.

Sidang aktivis belia yang berlangsung di Politeknik Republic itu menampilkan para pemimpin belia dan pemimpin pertubuhan aktivis.

Seramai 65 pemimpin belia mewakili pertubuhan seperti sayap belia masjid dan pertubuhan-pertubuhan belia nasional dijangka hadir dalam sidang tersebut.

Sidang sehari itu juga mempunyai matlamat meluaskan rangkaian kerja dengan pertubuhan-pertubuhan belia bukan Islam.

Menerusi sidang itu, Encik Aaron berharap para peserta dapat meraih pengalaman daripada para pemimpin pertubuhan mengenai cara menganjurkan sesuatu program atau menjalankan kempen kesedaran mengenai sesuatu isu.

'Selain meraih pengalaman yang positif, kami juga berharap para peserta dapat belajar daripada kesilapan yang pernah dilakukan pertubuhan-pertubuhan lain agar ia tidak berulang,' kata Encik Aaron.

Antara aktivis yang diundang untuk memberikan ceramah di sidang itu ialah Encik Satwant Singh daripada Persatuan Muda Sikh. Beliau akan membincangkan tentang usaha menganjur dan melaksanakan projek-projek kemasyarakatan di luar negara.

Cik Oniatta Effendi, seorang aktivis seni, pula akan membincangkan tentang penglibatan belia dalam program kesenian.

Pengasas Yayasan Halogen, sebuah pertubuhan belia yang melatih belia menerusi program-program kepimpinan, Encik Martin Tan, akan memberikan ceramah mengenai belia dan kepimpinan.